

馬邑縣志下卷

藝文志

文以貫道彰往而昭來者也馬邑文藝屢經兵燹僅存什一於千百或著為傳記或形為詩歌雖言人人殊要皆茹英吐華一本於道中文義無足取者不錄

碑記

脩馬邑縣學志

僉事王從鼎撰

皇明大一統郡縣徧設學校以道德淑人心秦漢唐宋以來未有盛於今日也凡有官守者以崇文教飭祀典隆廟貌為知所先而不忘道之所自否則君子不錄馬邑學興創無可考前人之為何其苟簡而所以

馬邑縣志下

一

處吾夫子何其薄哉正殿聖賢神靈所棲制宜宏敞禋止三間而風雨不蔽餘皆歲久故構摧落頽垣敗壁幾為草莽之鄉過者瞻之孰知夫子宫墻之所在也我新河陳公寬以憲副按察冀北適蒞茲邑謁夫子廟喟然嘆曰吾夫子道德高厚與天地同運一廟之崇卑在夫子固不足以為損益但教化之地古今同仰鄙儒俗吏不知所先乃為夫子吝財若是乎隘且陋也因召宰邑者咎之咎曰四里小邑彫瘵久矣烏能舉大役屢曾申請上司不曰仍舊貫則曰俟歲豐登不曰工費浩則曰事非急務非吾罪也因按縣

藏果無餘積適有犯侵察院舊址者悉復之而以東南一區兌民間址以闢學門大路又措置銀二百餘兩委典史張信召工飭材以司出納增正殿二間而新其塑像隆其雕飾餘悉撤其舊而新之曰明倫堂戟門曰櫺門星曰庖曰廩各為間者三曰號舍為間者十四殿廡之上黝堊丹漆煥然維新堂門以下皆中矩度經始於弘治辛酉三月落成於十月知縣張文燧教諭唐盛訓導杜森與諸生謀曰邊方小邑學校久廢今輪奐一新而士氣倍增儒風丕振大為茲邑之光是後也烏可不書諸石以昭示永永因具始

馬邑縣志下

二

末狀求予記予謂有天地則有吾道有吾身則知有夫子大而三綱五常小至一事一物道吾不在吾夫子揭道之的以詔萬世微夫子孰知為臣而忠為子而孝乎我陳公以儒起家由進士拜監察御史擢僉事副使所至聲迹赫然皆由夫子之道而顯也茲學之脩其知所先而不忘所自者歟昔李鄴侯新處州孔子廟韓昌黎稱之曰鄴侯尚文故其為政知所先後今馬邑之功何愧於處州惜無昌黎之文以揄揚之如予之粗淺烏足以當紀載之任聊以塞二三子之求耳然陳公之功亦非予文所能盡也是為記

脩馬邑縣城記

教諭張克忠撰

馬邑城巔末沿革見諸前志然形勢雖雄不過屹然土墉而已以之抗醜虜捍強敵非所宜也時隆慶六年巡撫大同地方劉公應箕按宣大史劉公良弼因北虜款貢適厯內憂乃協謀具疏上請凡應山懷馬悉

請磚之蓋欲為未雨綢繆之謀以奠

國家無疆之基也於時

上允其奏財發於帑工出於丘以厥任責成於知縣事岳汴守備時爾直比三年之內務覘成效二公夙夜

馬邑縣志下

三

勤勞罔敢暇逸公賞罰以勵工匠均勞逸以平役使不二載而大工告成紀其時經始於隆慶六年暮春之朔落成於萬曆元年中秋之望夫厥功既成乃要其支費括其出納度其規模以紀其盛大墻敵臺所以雄保障也周圍共六百四十丈高三丈甕城二座所以樹重關也周圍共六十丈各高三丈四尺女墻一圍所以捍矢石也通長高四丈月城二座所以聯抱掩也周圍共五十丈高二丈東西二門如制三重縵以鐵葉固以鋼釘鏗乎其堅也東西起大樓二座四面鋪樓各三座四角敵樓一座危乎其崇也城之

基奠之以石共用石條四千五百大石之上積之以
磚共用磚三百五十六萬四千箇聯磚石而一之者
灰也共用灰一萬八千四十五石造磚石而成之者
夫也共用軍民夫匠七百餘名夫役非糧則疲共食
口糧四百八十石四斗七升工匠非賞則惰共用工
價銀四百四十兩八錢四分鹽菜所以佐食也共用
鹽菜銀五百五十二兩九錢石炭所以煉坯也共用
工價銀二千五十三兩二錢夫出納明則支費足支
費足則規模定此大工之成所以有可紀也嗚呼是
工也匪才則孰與治匪機則孰與成吾岳時二公有
此矣是為序

馬邑縣志下

四

新建唐鄂國尉遲廟記

御史蒙詔撰

自昔豪傑之生鍾天地剛大磅礴之氣豈特揚曜吐
精樹勲業於當時已哉雖其沒也而是氣流通於天
地間與日星並明與陰陽並運不隨生而存不隨死
而亡每有感觸輒形諸夢兆若桴鼓影響然嗚呼烈
哉予昔閱唐書嘗壯尉遲公之為人嘆其真豪傑士

非特將畧之雄也每讀其傳歛襟起敬久之而公則朔產也嘉靖丙寅歲予奉

命按治宣雲夏四月巡歷至馬邑一夕夢金甲神英姿環持直立馬上馬蹠蹶若龍金戈翠旗導從前後謁予若有所訴者予覺大偉異其事翌日出至龍泉寺見唐鄂國公遺像在焉叩其所自邑尹吳子進曰鄂國舊有祠去此僅二里許藝於燹火有年矣棟宇灰燼惟神與馬巋然獨存居民不狎於棲神之無所權奉於此以存尸祝遂即其遺址觀焉草莽丘墟嗟言懷感予曰異哉向夕予夢金甲之神非與祠前有金

馬邑縣志下

五

龍池即桑乾河源也清漣澄澈嚴冬不凝邑尹復進曰舊傳池有龍時化為馬一驪一黃人莫敢御唯鄂國驍勇絕倫能跨而制之予又曰異哉予向夢金甲之龍駒非與夫鄂國輔唐昌運其所樹立固雄偉非常而臨陣決勝指麾馳驟無能當之者蓋得於馬力居多然則馬之為龍昭昭也乃千有餘載予夢中歷歷見之一何竒哉於是諸武士蹠而言曰惟我鄂公生此朔方靈憑於茲凡軍旅所向咸有陰助吾人藉神威久矣廟貌不稱何以振揚士氣乎於是諸耆民蹠而言曰惟我鄂公悒悒茲土民有寧宇歲時禱祀

應靡弗預患為之駟而灾為之禦吾人蒙庇久矣祀
典不脩何以慰愜人心乎予曰噫哉夫有功於民則
祀之能捍大患則祀之神兼焉矧赫厥靈於夢寐是
神之冀也民之望也而亦觀風者之責也盍祀哉盍
祀哉乃語冀北分守范君暨邑尹謀新之乃為正祠
三間轟如也為左右廊房六間耳房六間櫛如也為
二門三間大門三間翼如也圍以堡墻周六十四丈
一尺有奇曠如也戢如也地仍於舊紀芳趾也費出
於公杜私擾也經始於去秋七月十日落成於今春
三月念日周綜理也復買近地一頃以給守祠之後

馬邑縣志下

六

圖久遠也聲以鍾鼓樹以干旌俾民耳目有觀聽也
祠宇既成廟貌攸妥辦香瞻拜宛若夢中見者於是
士氣奮揚人心孚悅適范君擢口北分巡周君以山
西督學來代暨吳尹復言於予曰鄂國見夢於公豈
惟其祠祀是崇哉亦將賴公文以垂不朽予曰有是
哉顧予安能文之雖然公之勛業載在汗史者則不
然可不勒諸貞珉以告於世予謹按史稽首言曰嗟
嗟鄂國其真古豪傑士哉方其崛起兜鍪中遭際英
主乘時奮翥嘗先登陷陣擐甲而擒世充攘臂而平
黑闥搴旗而降建德奪槊而墜雄信一時智勇如衛

公褒公皆自謂莫及則公勲烈豈不巍然出諸將之上哉然世人皆知公雄勇冠軍至論公人品世未必盡知也予嘗究公為人大類關雲長云赤虬飄颻即鬚絕倫逸羣也所向披靡羣雄膽落即羽威震敵國也躍馬突陣而脫秦王其視解圍古城者無愧也擒王琬萬人中叢刺莫傷其視馳勒顏良者何惡也羽於玄德授以肝膽公事太宗撫以赤心尋相之誘不去建元之賄不入其精忠大節相符契也羽乘赤兔公得驪駒類皆龍種蓋天所默賚以弼成雄竒踔絕之蹟者又相脗合也雖羽不幸死國事公幸而興唐

馬邑縣志下

七

其大都實等埒焉然此特公論人品耳至其心術之微世又未必盡知也是故席次憤歐人謂公為非禮不知公忠義不容姦邪乃其天性視誤國之許敬宗懷姦之徐世勣不啻犬豕肯其與為伍哉富不易妻人謂公守己介特不知公因是悟主使當時知此義則才人不選貞觀無養虎之愆昭儀不立永徽無牝雞之惡又安致顯慶以後紛紛哉噫此公處心積處之微世莫能知者予叙公勲業因白其心如此俾後為將者知先立根本毋徒視勇略為也嗚呼方今邊郵多警安得如公者坐鎮帥閫叱咤風雲使醜虜不

敢南牧以抒

當寧西廟之憂哉予聞朔俗慎伎好氣慷慨磊落士多
生其地庸知不有繼公而出者哉文信國曰歿不俎
豆其間者非夫也今廟貌赫奕人心敬仰又庸知不
有興起奮勵思接武俎豆者哉予願公靈當默佑於
斯也范君諱大儒山東霑化人庚戌進士周君諱斯
盛陝西寧州人癸丑進士吳子諱國貢登州府人貢
士於茲籌義殫力克襄成事例得書云

重脩唐鄂國公廟記

知縣王一鳴撰

馬邑城西北十里許舊有唐鄂國公廟創造罔稽何
馬邑縣志下 八

時重脩於弘治辛亥歲有碑文可徵按公姓尉遲字
敬德謚忠武族居鄯陽避稍以勇稱辭昏以義聞除
亂輔德以忠貞著固宜凌煙昭一代之名馬邑享百
世之祀者洎嘉靖辛丑歲北虜入寇殿宇神像焚毀
幾於丘墟迺今戊申歲春

欽差鎮守總戎周 築長城萬里遠服胡人脩廣厦千
間大庇塞士因武事之少寧乘農工之未作捐俸集
財量功命日遣旗牌官劉勳同本城守備王貫董其
役督千戶陳國謨趨其事且倡邑士及鄰境文紳武
弁富者助以財貧者効以力暨本職率典史孟傑謀

諸儒學教諭李善訓導苟廉亦各贊襄於其間踰月
苟完再月苟美正殿三間鄂公居之兩廊六間副將
居之左右房六間以供春秋之祀內外門二座以嚴
出入之防甬道周旋以便行禮垣墉繚繞以蔽窺褻
煥然廟宇之一新儼然神像之魚備碧水帶環於前
後青山屏列於左右天草鋪茵喬林設幕對景可以
樂天真閒鷗浮藻遊魚穿蒲觀物可以形自得向日
景物荒涼之區遂成登臨佳勝之地矣夫工不成於
成之日必有所由起事不樂於樂之時亦必有所由
兆即今

馬邑縣志下

九

天子端穆穆之容大臣廣休休之席軍門隆韓范之譽
元戎擅頗牧之威北虜退處於窮廬黎元樂業於畝
畝道路之間謀之往來晝夜無烽燧之警懼周公之
力居多所以有落成之美也昔孔子曰俎豆之事則
嘗聞之矣軍旅之事未之學也是匪直為衛君告所
以為世道惜今而襲英雄之威望際世道之昇平報
往昔之功勲舉廢墜之典禮予何辛而見俎豆之敦
宗而不見軍旅之橈攘夫不見軍旅之橈攘周公匿
武之功而見俎豆之敦崇周公覲文之力邊陲有此
中原可知固可以慶幸太平樂舉祀事不然奔走禦

侮之不暇吾輩得以優游此境乎嗚呼若周公者畫
策護民而安九邊之赤子盡心報國而鞏萬載之
皇圖其勇義忠貞視鄂公諒不多讓則夫今之視昔亦
猶後之視今也績繼凌煙祀享世廟不可立而待歟
不可立而待歟茲我輩所以樂觀厥成而欲銘功於
不朽也遂演以為記

重脩唐鄂國公廟記

府同孟周撰

桑乾冀北名川也發源龍池遡地會西山之脉撼洪
濤之根通天池之絡放桑乾之瀾滂滂淵淵洞洞汨
汨真魚龍居也志載池內獲馬之異及閱宋漁應制
馬邑縣志下

一。

撰鬼羅國獻白龍馬記迹於志載符節相合迺知天
啓明良川澤効靈非常也非誕也朔人尉遲敬德
獲之屢收戰績土人竒其神也築廟池側及我
太祖出主百神錄入祀典弘治間巡按侯公一恢拓矣
歲久風雨震凌將為漁牧地矣嘉靖甲申夏侍御寧
夏王公按朔道謁將軍真在此哉久而嘖嘖謂少叅
王公僉憲田公曰忍是廢哉國家昭忠勸義之典可
廢耶職祀典者即是而可占矣復謂守朔太監閻公
曰君寄心腹此典

祖宗有天下首意也計果偕此不其克寄耶閻亟唯之

明日鳩工運材樹額易腐補弊繪落不踰夏於侯有
光矣第見礎綉枕龍垆之勝飛甍跨馮夷之宮洪濤
納翠舒卷烟霞海日朝紅浮沉金碧襟明月蘆華之
渚掖青蓮碧水之禪清泉萬竇鏡撒輪旋池影星旗
鼇吞蛟吐草烟點白鷺之幽柳衙浸琉璃之冷儲是
清竒物有不異廟有不神人有不景哉昔朱文公為
浙東常平使按黃巖首表溫節徐先生墓朱伯賢嘉
其勵風勸也王公當人心震懾之際倉卒而倡此舉
闔樂施已有夙夜祇承駿圖上答

高廟駕馭豪傑之意下慰九泉忠義之望中作隍陴歎
馬邑縣志下

二

羨奮勵之氣不刑賞而風勸能心文公心矣然不請
而令出後舉而人趨水村野廟動多繡之物色顏垣
破厦煥丹雘之層光緣忠義之在人心千古不壞故
翕應一機耳宋儒謂神不神於神神於人心之誠此
類人或以武人目之不知公之武根於義盡於忠觀
解衣出癥許婚面違可謂倨倨丈夫矣故謚曰忠武
將軍名姓垂凌烟勲業悉許敬宗應制之碑文厚葬
陪昭陵其廟貌迭新殆與水光山色爭明於無窮矣
廟西五里周之別業也少嘗藏脩於是休日徜徉於
是目其廢也特起玄都之慨感其興也遂忘續貂之

陋以塞請

重建鄂國祠碑記

給事中嚴從簡撰

馬邑之西北十里許有鄂國公祠故唐尉遲敬德所
血食也其南即為金龍池界迫窮廬豺狼叵測祠之
蕩於虜燹也有年矣歲丙寅柱史蒙翁近野奉

命按治茲鎮政成令洽百廢咸秩迺以其餘力聿新厥
祠蓋鄂公朔產邦人仰止如淮陰之廟韓信解州之
廟關羽所以崇遐勲倡雄氣而於邊壤為尤要馬先
是近翁涖馬邑一夕夢金甲神來謁英氣凜爍直立
馬上馬適如龍歷歷可紀莫知何祥惟謹秘之翼日

馬邑縣志下

一三

聞金龍池即桑乾河源也因達觀焉得祠遺址荒雲
宿草方為太息縣令吳進曰此池後魏以來相傳有
二龍時化為馬一驪一黃天陰輒出人間牝馬遇之
生駒神俊或有角若鹿茸然未有豢之者鄂國生而
驍勇思收為騎每潛祠池傍果有神駒遊焉即飛跨
其上駒欲入池鄂國力制驅迴嗣是出入兵革多藉
其力後人因建祠於茲蓋謂天以授公存沒所憑也
近翁悟曰異哉昨霄之兆豈鄂國以冥棲無據乘龍
而告我乎且其豐功偉誼足表朔方祠非淫瀆久圯
不葺政媿幽格其何以鼓舞士氣乎乃命縣令聚材

鳩工邑中子來煥焉美完予適以使至雲中近翁為道其詳屬予記之予讀唐史見唐太宗之於鄂國惟以一言作合曰大丈夫意氣相期嘗深味斯語謂豈特一時君臣之會為爾哉凡我志士達人雖曠百世且有相感者亦惟此意氣耳蓋氣在天地浩然流行其鍾於人也或為忠節或為政事或為武績或為文章雖樹立不同同於至大至剛之發越焉不以生有不以死亡不以古有不以今無固有通千載為一息者是故孔子見周公於几席其經綸康泰之氣通也陶潛見羲皇於北窓其淡泊真純之氣通也今夫鄂

馬邑縣志下

一三

國從太宗討竇建德王世充劉黑闥戰既高出諸將上然方其初附唐幕大分未定不隨尋相等叛去而傾心太宗及建成元吉誘以金銀一車不為動太宗有心如山嶽之許忠節武積鄂國之表見於昔者何剛大也近翁學冠天人才宏黼黻由進士拜大行采風四方燭乎不辱今驄馬行邊以春陽惠民以秋霜摧奸以時雨造士以盟鑑肅僚則文章政事近翁之顯設於今者何剛大也且鄂國固比隅名將既佐武德之勲及於貞觀弼成太平善政能以富不易妻辭尚帝女晚年自戢不通賓客克保令終尤文士知幾

之所不及是又非鄂國之所以俯俟不惑者耶近翁固南海名儒立朝正色風節獨擎繡斧攸屈驂虜遠適寓折衝於樽俎誠可謂壯猷允武是又非近翁之所以仰契不謬者耶意氣夙浹精神默孚夢寐之見亦豈偶哉且龍馬之說明証志冊固可覘乾陽之氣變化不拘而鄂國收之雖不史載然稱鄂國嘗以單騎蹈萬軍中叢刺莫傷雄信之園太宗幾陷鄂國躍馬大呼翼之出使其乘非龍種烏能若是捷足哉人傳當為不誣况祭法所載像奉為宜非特妥鄂國之靈亦以秩正殷禮教人有勇知方也自今伊始香火

馬邑縣志下

十四

駢巖葩芬暢達觸處洋洋將使星輝狐嶺月朗鳳山其公委身英主之明見歟浪翻威海風鼓滄海其公決策秦府之雄斷歟雷轟鴈塞虎嘯榆林其公三奪利稍之叱咤歟氣消恒嶽蜂息白登其公翊贊

皇靈之玄威歟頗牧踵生韓劉輩出其公式穀後進之毓秀歟鄂國之氣瀰漫宇宙形著於西北而寄寓於一祠非鄂國之精爽不能妙感通於異代非近翁之卓越不能起積毀於煙莽其竒跡宏制皆可述也予故特闡其微以昭後人尚珍重厥祀時加敬護其培浩然者使龍驤之士應運名世以不負近翁相期無

窮之意氣云

建金龍池捲棚記

知縣王日新撰

萬曆癸巳之正月余奉

命令馬邑未就道時有客燕臺者謂余曰馬邑於古為
寰州治之乾方十里許有池名金龍舊傳二龍出化
為馬馬以龍故騰驤莫能制尉遲敬德氏跨之崛起
山後為李唐名將譚雲中勝蹟必首稱焉比蒞任前
大叅汴京周公過金龍余徃候之計時尚蚤因先謁
尉遲公廟廟兩廊多繪事肖尉遲公像於其中凜凜
有生氣當時單鞭奪鞘之威可得於想像間出遂徒

馬邑縣志下

十五

步行小憇於今金龍池則見烟柳垂金春波漾玉恍
若西湖漱灑殊不似邊地春暮猶苦寒也凭欄瞰池
中水清澈可鑑眉睫池水東流稍折而南約二射即
產龍馬處深莫得其底池上有寺寺四圍皆水環遠
之因額曰水圍西畔有公署堂阿門塾稍深邃乃寺
之前止敞廳三楹基地址不能避風雨諸
使者行部至多臨流具壺觸以暢幽懷預期必構棚
棚用布彩嘗以時促不能具居民供應頗苦之一日
父老謂余曰安得建捲棚三楹則一勞永逸也顧余
以初至輒興土木又民苦貧材木瓦甍維艱未敢議

迨今歲春三月

侍御林公至有期諸公署當重葺池之廳有圯狀時示寂僧名圓行者頗持戒為邑之人重存日募萬人緣脩舍利院尚餘金若干余聞而喜曰東天即西天之佛也此獨非舍利處乎迺以其意白之

少叅盛公遂易房三楹撤而運之池之上為建捲棚計因以葺池之廳費頗饒不足則又益以公帑之羨命丞廣武驛張子介與住持僧明月督其事甫旬日棚翼然煥然而廳前有棚後有屏兩傍有牕眎昔之隘且陋不復同矣或曰王子侈游觀乎余曰案牘旁

馬邑縣志下

十六

午催科無暇日安能杯酒流連光景也然則王子其先憂後樂者與余曰檮腐之材謬典疲邑土瘠而賦重民貧而役繁且也路當三晉之衝冠蓋時或相望受事以來日夜焦勞頭上髮星星白乃若所憂誠有之樂則吾不知也僧明月以棚成當有記紀歲月余因次前說以為之記

詩歌

遊神頭山

知縣王一鳴

神頭山下黃道泉故老相傳幾百年天池飄墜車輪在金珠又見七魚穿出入沒潛通真竒絕混混日夜崑崙泄共工觸倒不周山天柱折兮地維缺脉絡直衝

尾閭開萬丈洪濤一滾來
滄的神婆無去處攜兒奔
上北山隈氣喘神體勞
無力手按山頭暫憩息
曉起窮荒乏鏡臺
牙梳塵滿無人拭
神婆發憤氣猶龍
推倒雷山一二峯
東海順流千里去
週折關河幾萬重
平灘遺與幽人寓
問津嘗訪桃源路
白蘋紅蓼傍晴州
野鷺閒鷗依晚渡
春回淑氣正暄妍
勝日尋芳述古聯
兩箇黃鸝鳴翠柳
一行白鷺上青天
南薰披拂景悠哉
傲暑閒將好句裁
一水護田將綠遶
兩山排闥送青來
牢落烟霞值晚秋
古人佳製與今謀
殘星幾點鴈橫塞
長笛一聲人倚樓
太呂吹殘葭管
灰霸

馬邑縣志下

十七

橋詩興慢猷推岸容待臘方舒柳
雪意衝寒欲放梅
遊子關山應有約
四時風月休閒却
翻雲覆雨隨浮沉
海角天涯任風泊
回首長安雲路遙
參差樓閣傍層霄
瓊筵金縷消
長日寶鴨龍涎俟
早

朝孤臣流落窮荒域
風起塵沙天改色
三月忘味豈聞韶
數間破屋聊為息
故鄉遙望白雲邊
鴈門紫塞互相連
舉目江河風景異
陰陰高柳不聞蟬
泮水相逢一二客
笑談共坐三生石
隰水冷冷含太虛
塞風淅淅侵瑤席
水哉水哉逝不窮
曾悲胡馬飲西風
而今萬里長城在
伏劔崆峒氣若虹
奮然一指旄頭落

堯天蕩蕩祥光爍喜逢河潤海波澄活水源頭分一
勺易水寒兮沂水溫此水夏冷冬燠存浩浩七泉通
地竅汪汪千頃接天源坎德醇良調五味造就飲食
和腸胃海鹹河淡醴泉甘玄酒太羹天一氣君不見
名川巨瀆滿中原銀漢滄溟雪浪翻勝地無人不贈
句良辰有客便頃罇嗟爾七輪生邊邑浮光靜影軋
坤翕夜闌星月照寒潭璞石獨有卞和泣囑付山人
莫把滄浪輕留與時賢好濯纓好濯纓奮力輔
皇明一朝挽回天池水洗絕胡塵萬古清

洪濤雨霽

馬邑縣志下

十八

彷彿正峯插太清行雲行雨互陰晴雨餘粧點芳園
媚月煥融光寶鏡明西子新粧烏髻縮南威初盡翠
眉橫凭高遙送元龍目一片襟懷萬古情

玉泉秋聲

直上波濤三尺高飛來點點落瓊瑤清風帶雨思瀟
颯白電連山合動搖鱗屋龍宮驚霹靂貝宮朱館間
笙簫翻思往昔朝真者羽佩琳瑯颺玉飈

鴈門聳秀

少昊行秋紫塞涼雨餘頓改鴈山光虎幟旌旗濃墨
染石壁樓臺淡粉粧紅葉飽霜渾覺醉黃花笑日欲

飄香此時邊將凭欄日五色雲飛遶 帝鄉

古寰落照

浮屠千尺挿穹蒼倒影婆娑射遠岡列草參差橫朔
野落霞來徃際燕鄉牛羊促地歸荒徑鷺鶴翻空下
碧塘猶有二三僧住持數聲鍾磬掩昏黃

櫓臺遠眺

李靖行踪世已休危樓猶可縱明眸青林隱顯長城
疊白草高低亂塚丘鴻雁遠拖秋色去鷺鷗斜帶夕
陽浮山河若歷前人事幾度興亡嘆白頭

龍池月夜

馬邑縣志下

十九

龍沼周遭遶綠蕪星稀雲靜月平鋪分明塞北初懸
鏡彷彿江南小樣湖梵宇波涵沉影壁水晶盤捧夜
光珠鄂公汗馬功勞大羸取凌煙古畫圖

桑乾冬燠

雲樹蒼蒼拂曙霞渡頭人喚渡頭家斷橋流水搖紅
影寒雪飛空落鬢華驚散鷺鷗漁父棹吹殘星夜戍
樓笳山光隱隱朝曦上已映灘前紅蓼花

神坡古寺

古寰南上紫金山山畔神坡古寺間落盡丹青閑聖
壁老殘松檜擁禪關門臨蒼莽無人過閣倚嵯峨有

鳥還欲拂斷碑尋建號不堪文字染苔班

游金龍池

提學副使

名失傳

秋宮光映水光藍午夜分明月浸潭一脈不知來遠
近衆流分見下東南清分逼我渾忘俗好景令人每
駐驂人傑地靈相倚伏應知鍾秀產奇男

題尉遲敬德廟

前人

金龍池口水如藍長夏涓涓浸碧潭千古佳名傳冀
北一團清致勝江南月明夜靜鳴禪磬樹密風寒駐
客驂憶自鄂公勲業後有誰能繼作奇男

謁鄂公祠

御史蘇天佑

馬邑縣志下

二十

閣顏遺像凋生色池古荒祠俯碧泉天馬千秋空渥
水雲龍一代已凌烟可憐契合風塵際大美飛騰戰
陣前旗鼓倘仍懸大將犬羊寧復冠頻年

題桑乾河

參政蘇志臯

吾鄉最苦桑乾水今日尋源到此間說與山靈牢記
取休教東入紫荆關

游金龍池

舊傳二龍
出化為馬

御史吳禮嘉

一池深碧自何年見說神龍向此卷願化雄鳴雙寶
劍橫飛朔漠淨胡天

與雨山李君碧登回承鹿坪郭君召因約觀金

龍池

太僕卿申維岱

道出龍池近還約鴈序
眈金龍化已久池水尚堪憐
縱是沙為岍不為風所擊
隆冬涵暖氣朝日散清煙
潤藉桑乾遠激激霄漢
連濯纓慙我鬢把釣柰塵緣
攜取橘中意悠懷泌什篇
徘徊歸次晚候炬滿前川

冬日同申玄野同卿李雨山兵憲游金龍池

參議郭性之

池裡龍飛不計年龍門雙節駐
川池流影漾桑乾
月龍馭羣空冀北天喜御仙舟還
泛泛愁看鳥鷺欲
翩翩留君莫厭平原飲一別雲
模萬仞巔

馬邑縣志下

二十一

游金龍池

參政周于德

野闊平池樣碧空桑乾一派近
相通蕭條蒲柳新霜
露寂寞魚龍舊渚宮秋老鴈關
明漢月田連馬邑盡
堯封好將滿地深源水興作邊
氓灌溉功

過乃河望尉遲敬德故宅 前人

戟如攢棘劍如林百戰英雄國
士心共事一時投意
氣結交原不問黃金

題金龍池

永年馬之麟 朔州守

平泉噴玉湛深池
派衍桑乾古渡湄
汗血浮蹤傳尚
信泣珠潛室轉生疑
洪濤沒虜迷天塹
細潤興苗入

野陂直向盧溝橋畔注金湯千里壯 皇維

游金龍池擬古

東牟王日新本縣令

金龍金龍幾經年于今池上水潺湲一泓清碧可人
愛凭欄欲去又依然我聞聲品匹九逸追風逐電還
稱德一朝際遇良將才長安日照黃金勒敬德梟雄
軼千古單鞭奪稍人爭詡山後誰知烈士名池邊浴
馬救英主聞難當年躍馬來雄信膽落水之隈勤王
不用飛羽檄氣如潮吐聲如雷帳下初標虎士名解
衣同榻心已傾雄圖俠骨俱銷歇凌烟遺跡尚轟轟
池水東流波蕩漾廟貌巍巍池之上島夷年來正陸

馬邑縣志下

二十二

梁東征安得如公將

余家海上時方苦倭故云

水圍寺

前人

池塘凝碧沁漣漪中有琳宮鎖翠微四壁光涵圍夜
月三冬氣煖映朝曦鐘聲斷續人間隔花影扶疎僧
舍宜坐久塵襟渾滌盡頓忘蓬跡寄天涯

登櫓臺

前人

高臺百尺倚青穹登眺翩翩眼界空遠近逢巒環足
底縱橫斗宿列懷中波濤夜見龍池月樓閣秋凭鴈
塞風造化看來原在戎須將丹粒起疲瘡

續錄

夏日遊金龍池漫成一律一紀簡王茂宰

關中辛志登 左參議

平生故有煙霞癖每到登臨便不還
自向龍池來睡覺誰驅車馬去
間關濯纓苦憶綸巾白把扇懸驚舞
袖斑無那雙飛天外鶴致身千仞
杳難攀立馬郵亭拂袖塵炎蒸
逃暑水之濱幾回欲向臨池
醉只恐清溪解笑人

遊水園寺

東牟王德新 前容城令

梵王宮殿敞朱扉夏日攜樽入翠微
地靜紅塵無處着雲深白鶴有時歸
細縕嵐氣連千嶂激灑波光繞

馬邑縣志下

二十三

四圍彷彿如來真境界山人留偈欲皈衣

登櫓臺

臺為李靖所築觀星者

前人

舊築高臺不記年築臺人去斗星閑
空餘樓閣烟雲裏常見闕山朔漠間
往事不須增感慨清時自喜足
躋攀衛公勲業俱湮沒只此遺踪在古寰

文明閣

在櫓臺上

起下足乘雲霧升高手摘星辰百尺爭
誇危峻千年永翊文明
洪濤山人題

小憇水園寺 四首

御史湯北京

菰蒲深處綠成陰
水榭周遭灌木森
不信滄洲移紫塞
何妨攬轡便抽簪

水園孤寺一僧多
鏡裏紅塵迥不過
唯有幽禽啼白晝
閒持貝葉坐青莎

觸暑馳驅亦可憐
披襟蘭若水中天
何人恨瘦桑乾去
此日臨流自爽然

日昨驂駢又撲塵
波光迴首意愈親
林香冉冉花無主
谷響嚶嚶鳥送人

水園寺

嶧山潘榛 主事

馬邑縣志下

二十四

移蓋池亭下悠然興自生
水清方照物山遠不知名
蒲柳群相向鳶魚各有情
留連迷去路誰謂是邊城

過尉遲敬德廟懷古

前人

鄂公英風古無比
此日過公之故里
里中祠廟肖遺容
血食伏臘無窮紀
毛髮欲動色欲嗔
行人瞻之肅馬起
祠傍猶有金龍池
人傳天馬生池裏
為龍為怪故不馴
公自伏之如蝼螳
跨來酣戰幾百場
劃然隋楊始定李我仰
高踪一此遊
低徊日暮脫劍履
潺潺池水西還東
落落群山岵與岵
水流山峙古今同
英雄戰骨今枯矣

過水園寺

漳浦楊一葵 副使

夾路垂楊蔭古堤，行春聊一探幽棲。
江天日麗群峯霽，劍戟霜明萬馬嘶。
檻外浴鳧紛共語，山中稚子喜相攜。
閑愁到此渾忘却，縱飲何妨醉似泥。

過馬邑宋明府要遊水園寺臨池泛舟 二首

濱隸劉餘澤 按察使

何來鴈塞得龍湫，行色還因地主留。
林水賸餘濠濮想，蘭舟不減習池遊。
芰荷入夏紅芳歇，明府曾種蓮未發葭
菼連天碧浪浮。無數白鷗窺客去，應嫌車馬點滄洲。
古木陰陰曲檻底，石亭窈窕枕招提。
逢僧細問津龍

馬邑縣志下

二十五

事金龍池名對酒閑聽翠鳥啼，水月滌沙時上下。
曇雲拂樹自東西，山光欲暝猶遲戀。
可柰紅塵促馬蹄。

水園寺和

楊致老憲使韻 二律

東魯張中鴻 左布政

蒼蒼山色暎芳堤，為愛池亭暫此棲。
翠荇牽風鳧共浴，綠楊含霧馬頻嘶。
澄潭聞說雙龍化，絕塞惟將一劍攜。
漫捲湘簾飛紫燕，梁間勿訝落香泥。
梵王宮殿鎖荒堤，地迥倫宜高隱棲。
香裊博爐僧入定，花迎征蓋馬長嘶。
環臺碧水凝無底，蘘袂白雲似可攜。
且喜榆關烽暫息，憑君重借一丸泥。

水園寺二律用

憲長楊先生韻

海岱張中鵠

古刹煙籠倚綉堤溶溶碧水抱禪棲上方清磬聞僧
語夾道綠楊聽馬嘶世外煙霞探便得夢中蕉鹿豈
堪攜况逢賢主能相款適意何須羨紫泥
離披草色綠楊堤雨霽閑雲樹杪棲鍾度曉風襟梵
唄泉穿石溜瀉哀嘶籌邊艾可三年蓄覽勝圖將五
岳攜清賞且拚今日醉升沉何必嘆雲泥

金龍池二律前韻

楊花飛雪颭香堤一水拖藍逸梵棲檻外魚遊鷗欲

馬邑縣志下

二十六

下池中龍去馬猶嘶山僧共話風幡動旅客空將書
劍攜家夢中猶未至一尊聊此踏香泥

白蘋紅蓼映煙堤片片白雲護竹棲鄂國雄姿猶睇
蠻金池龍馬尚嬌嘶望中烟樹思如結客裡驚花酒
漫攜試向禪闌詢老衲蓮花何日出深泥聞池中曾
栽藕故及

霍直指龍池別業

用任令韻

朔州守鄭時舉

清沅一派下山橋草岸盈仁起迅颭萬丈洪濤驚怪
湧滿川餘潤應江潮浮鷗盡夢閑青壑古木雲蒸插
碧霄堪羨此中多逸致暇來嘯傲興偏饒

馬邑新秋

鄭時舉

塞上塵清日裏中氣爽初雨餘蘇壠土霜晚慰菑畬
山淡雲根冷葉殘樹影疎秋光行且暮向傍犬羊居

秋日野眺

千家砧杵映秋風四野輕清此日同方羨水天唯一
色更憐雲樹又雙空憑闌遠送城南燕依檻回看塞
北鴻滿眼殘花真寂寞教人暗地想山翁

霍直指近水樓飲薄暮泛舟龍池鄭時舉

高樓席罷錦帆開簫鼓中流亦壯哉薄霧平鋪溪影
寂微風乍動水紋來燈明兩岸驚龍窟月印三秋近

馬邑縣志下

二十七

古臺慷慨主人多逸興何妨沉醉卧山隈

仲秋祀洪濤山眺望

任澄清

洪水發源清脉通天乙精百泉山下出一派地中行
古廟雲長鎖孤峰雪乍晴登臨情不已緩步到西城

洪濤眺望和前韻

霍鏌

山水自饒清蒙泉更吐精乾龍來脉聳野馬逐波行
幽宵偏宜嘯登臨最喜晴陽春况有脚早已布邊城

新春喜雪

任澄清

昨宵騰六驚飛輪暗送瓊花報早春庾嶺敲殘梅蕊
落梁園點綴柳枝新灞橋驢背詩思遠夜棹山陰興

趣真最愛陽春白雪景好將樽酒賞芳晨

新春喜雪和前韻

霍鎮

風吹玉葉掩冰輪六出平鋪大地春舞絮乍驚時序
改烹茶偏覺物華新藍闕撒馬忠還篤瀚海吞裘節
更真黍谷幸逢鄒子律敢云難和負良辰

和鄭公祖九日泛舟韻

前人

登高四望笑顏開復盪蘭橈更快哉岸柳迎人分綠
過淵魚弄月耀光來參差歌管催行酒寂寞烟波冷
釣臺借問蓬瀛何者似仙舟共泛白雲隈

盆菊

任澄清

馬邑縣志下

二十八

紅上白上間黃上次第移來列畫堂一自別離彭澤
後風塵不染有餘香

寒鵲爭梅画

前人

雪裏花開獨占竒紛紛鵲噪向南枝野橋無限芳菲
意絕勝鶯啼蝶舞時

霍公祖別業觀龍池

前人

一派汪洋架彩橋水晶宮殿雨瀟上風掀巨浪聞龍
吼月擁清波見海潮鷗鳥忘机眠翠柳樓臺壯麗薄
青霄中流砥柱狂瀾靜滿目雲山景色饒

秋日大同道中

前人

朔方落木悲深秋衰髮彈冠學壯遊塞上風霜驚鴈
度城頭鼓角動邊愁寒煙殺氣冲霄漢白草黃雲遶
戍樓胡馬干戈猶未歇請纓誰復繫毡裘

雲崗洞觀石佛

前人

巍亾古洞倚雲開斧斲神工亦異哉千佛靈光歸淨
土諸天法象傍巖隈石龕不惹風旛動蘭若惟看夜
月來空寂儼然西域界喜逢僧話共追陪

春日左衛道中

前人

邊城荒徼地蝴蝶夢中身戴月長驅馬停車數問津
黃沙迷萬里白雪積三春僕亾關山道低頭愧殺人

馬邑縣志下

二十九

次龍池前韻

霍鏌

水斷長堤續小橋激湍靈籟響森瀟銀河傾瀉驚風
雨碧海依稀聽汐潮檢點虛舟空世界凭臨浩月冷
雲霄千旄况復來仙令從此山林趣更饒

水園寺

任澄清

水寺湖天一徑通綠陰深處小橋東龍媒已去今何
在留得清池對梵宮

水園寺前韻

霍鏌

盈亾一水四圍通流過寒潭古廟東夜靜禪林明月
上恍疑身在水晶宮

神馬記

知縣任澄清撰

馬有神乎曰有上古羲皇之世負圖而出於何者非龍馬耶後世有產於渥窪者又何物耶蓋天地間物之最靈者莫如龍而生物不測者莫如水故蛟龍天馬恒產於水馬唐鄂國尉遲公乃一代元勳當年金龍池所獲之馬實天降之毛龍也余蒞任甫浹旬時九月既望吏請備牲醴粢盛謂詰旦應祀鄂公脩典故也是夜余夢有馬立大厦下毛骨駁異狀若龍驤第見厦屋傾圮天雨瀉淋以蘆席覆其馬之脊若有不堪居處狀夢既覺余悚而異之於是櫛沐待旦偕

馬邑縣志下

三十

韓李二廣文及從祭諸文學蚤有事於鄂公祠登堂駿奔觀其廟貌森嚴凜凜猶有生氣既而至神馬控立之所果見楹宇塌頽不蔽風雨馬有斷其脊裂其首缺其足者宛然夢中之境也於是命匠增脩施以丹堊而楹與馬且煥然一新矣余惟鄂公汗馬之勞照耀千古當年追風逐電所向無敵者固公之勇畧絕人亦豈非龍馬之力哉乃知鄂公之英靈百世不磨龍馬之精靈亦與之俱不磨其出也為馬其歸也為龍又豈因迹像之成虧為龍馬之增損也乎贊曰龍馬之見天助英雄維夢有感繫神所通

馬邑縣志跋

邑必有志者紀其實也志必重刻者通其變也蓋國家採風貢俗程物比事唯志是據變而通之存乎其人前者有作後者繼焉所從來矣第其事欲核核則信其詞欲直直則公非公且信摠之于志無當已馬邑在古為

馬邑縣志下

跋一

寰州前時志未有作者作之自邑進士武公文始歲月既久闕失漸多曩邑侯寧海王君曾董弟子員校讎而壽之梓已彬彬稱完錄矣迨自萬曆乙未而後迄今又一紀有餘其山川疆理之跡物產土俗之宜即今昔不殊而氣化之災祥民生之利病營建

之沿革與夫循良之政科貢之名不
無與時運相為盛衰而變遷者倘闕
逸靡紀後將何述歲乙巳邑侯宋君
以齊魯之英奉

命而來下車後即詢邑志咨故實閱人
文輒慨然欲重修之顧以為初政未
遑也越今已三載課績矣諸凡利者

興弊者剔訟者平賦者均載在士民
所為寔政錄中者若陶之善埴圓中
規方中矩匠之善木曲中鈎直應繩
于治可稱有成矣會戊申夏承

當路者檄俾重刻邑志遂屬諸士而
告之曰若生于斯長于斯其耳目之
所睹記罔不詳悉間有所宜增減者

當與衆商確以成信史不然而傳者
安于習述者狃于襲是土美也志之
不核焉用文之諸士曰唯唯退而謀
諸野得之者舊濟以傳聞事有該于
原本者則因之而不革事有未經紀
載者則益之而不泥視曩者所志尤
加詳焉余惟晉乘甲天下使經聖筆

當與春秋等馬邑雖其一隅乎得
侯之修而志愈重且使後之君子繼
此而興者得有所攷則斯志也其永
光晉乘哉余固嘉侯造馬邑之意甚
盛而又樂侯之志成也因僭而序之
用垂不朽云

奉政大夫臨洮府同知霍錢頓首拜撰